

Atòbius in lingua sarda – Atòbiu de otu

S'òmini e s'ambienti e is scobertas científicas

Finas a imoi non eus ancora chistionau de s'òmini e de cumenti s'ambienti a giru a giru mudat, càmbiat, po nexi, curpa, de s'òmini. Iat a essi bellu a cumprendi candu e pueta s'òmini at incarrerau a poni is manus in s'ambienti e cumenti seus arribaus a bivi in logus chi non sunt mancu prus bonus po s'òmini e totu. Sa stòria si narat chi unu pòpulu at mudau s'ambienti aici meda chi est arribau a ndi sperdi totus is lionis in s'Àfrica de susu: is romanus. Is romanus ant fatu òpers de importu costruendi acuedotus, bias, domus, citadis interas e ponendi in comunicatzioni totu su mundu connotu de s'època in su mare nostrum. Ma fadendi custu ant mudau s'ambienti puru. In Sardigna, po fai unu esempru, nd'ant segau matas medas in su Campidanu de giossu po liberai su logu e dd'arai a trigu. Ant liau perdas e materiali de is costrutzione prus antigas po ddu torrai a imperai in àteras struturas e pueta non ddis interessat prus a teni in peis cussas struturas e totu. Ant fatu dannus, ma a su pròpriu momentu ant fatu beni puru.

In sardu si narat “Fai beni e bai in ora mala”, ballit custu discursu po su chi iant fatu is romanus?

Segundu bosàterus candu est chi s'òmini at incarrereu a mudai s'ambienti e pieghendiddu e is esigènzias suas?

E candu custa cosa at incarrerau a si furriai contras a s'òmini?

Is òminis in su mundu a oi sunt pagu prus de 8 miliardus e nci sunt unus cantus de stùdius chi nant chi sa popolatzione de su mundu at sighiri a cresci finas a arribai a pagu prus de 10 miliardus. Castiendi parou is datus bideus ancora chi nci sunt partis de su mundu innoi ddoi bivit giai sa metadi de sa popolatzione mondiali, in piessignu: sa Cina e s'India. Custus sunt duus Stadus innoi is cunditionis de vida sunt intra issus differentis meda. In Cina po fai unu esempru nc'est òrdini, unu Stadu forti chi, a

maneda sua, tenit a incuru is bisòngius de sa genti. Is piciocheddus stùdiant, nc'est traballu po totus e sa genti parrit prexada de su Guvernu. Parrit is cunditionis giustas po biri pipius nascendi e sa genti crescendi beni. S'India invècias parrit differenti. Po primu mancat s'òrdini. Is citadis sunt prenas de genti e parrit chi totus fatzant cumenti bolint. Is piciocheddus stùdiant, ma totus? Parrit chi nci siat prus povuresa. De s'àtera parti parou is piciocheddus chi stùdiant parrint prus bravus e is chi benint in Europa non tenint nudda de mancu de is europeus. De siguru non podeus nai chi nci siat su benessere chi ddoi est in àteras partis de su mundu.

Cali sunt is fatoris chi ant portau a fai cresci aici meda sa popolatzioni in cussas partis de su mundu mancai parrat chi invècias s'Europa siat su Continenti mellus po crèsci is pipius?

S'Europa donat meda a sa genti e prus che totu sa saludi e sa libertadi. In Europa si podeus movi de unu Stadu a s'àteru feti cun sa carta de identidadi e cun sa tèssera sanitària is europeus tenint su diritu de essi curaus in ònnia Stadu de s'Unioni. Is piciocheddus podint andai foras de Stadu a studiaai cun programas dedicaus, imparant àteras lènguas e àteras culturas. Onniunu est lìberu de crei in su chi bolit, de pentzai e de nai su chi bolit portendi rispetu a is àterus. Teneus su dotori de famìllia, is spidalis e is mexinas paghendi feti una parti de su prètziu interu. Custu iat a parri su logu perfetu po fai una famìllia e invècias innoi is pipius sunt sèmpiri prus pagus. Custu non fait beni a s'economia cumenti dd'eus pentzada nosu poita prus pagu genti traballat, prus pagu sa genti còmporat e prus pagu impostas pagat, su chi portat a teni prus pagu dinai po sa parti sociali de su Stadu e duncas prus pagus servìtzius po sa comunidadi.

Ma custu modu nostu de bivi est sostenìbili? Podit essi che su smenguamentu de sa popolatzioni siat unu fatori nareus naturali pueta seus giai tochendi su lìmite massimu de su chi sa Terra podit arrei?

Nci sunt unus cantus de cosas chi ant portau sa popolatzioni mondiali a cresci aici meda: sa paxi, sa cosa de papai e de bufai e is mexinas. Difatis sa genti non morrit prus in is gherras cumenti morriat a inantis e totus cun sa globalizatzioni teneus fruta e birdura a totu annu. Podeus papai mellus e agataus sèmpiri su chi si circaus. In prus nci sunt is mexinas. Pentzaus feti a is antibiòticus cantu genti ant salvau e salvant ancora. Ma puru totus is curas po cussas maladies chi primu mancu si connosciant. Sa genti bivit mellus, ma sa Terra stait sèmpiri peus.

Nc'est segundu bosàterus unu modu po sighiri a bivi aici beni e fai torrai a stai beni sa Terra puru? Seus de a berus nosus chi seus cambiendi s'ambienti aici meda o s'ambienti iat a essi cambiau a su pròpriu?